

(UTUSAN MALAYSIA (CEUKAN) 9 MEI 2016 M/S 31

Nasib bekas pemain negara, Asyraf dapat perhatian



ROZILAN SALLEH menyampaikan sumbangan kepada Muhammad Asyraf Anbalagan Abdullah (berkerusi roda) selepas perlawanan bola sepak amal di Kuantan semalam. - BERNAMA

KUANTAN 8 Mei - Nasib bekas pemain bola sepak negara Muhammad Asyraf Anbalagan Abdullah, 49, yang kini tidak mampu berjalan akibat angin ahmar tahun lepas, mendapat perhatian Kelab Anak-anak Jerantut@Klang Valley (JKV).

JKV memberikan sumbangan sebanyak RM3,000 kepada Muhammad Asyraf sebagai menghargai jasa dan sumbangan bekas penyering kebangsaan itu terhadap bola sepak negara.

Sumbangan yang disampaikan Setiausaha Akhbar Perdana Menteri Datuk Seri Najib Tun Razak, Datuk Rozilan Salleh yang juga Presiden JKV itu merupakan hasil kutipan derma pada kejohanan bola sepak lapan penjuru pada April lepas.

Sementara itu, isteri Muhammad

Asyraf, Hamili Hamzah, 46, ketika ditemui pemberita berkata suaminya diserang angin ahmar pada Januari tahun lepas dan kini menjalani rawatan fisioterapi di Hospital Tengku Ampuan Afzan di sini.

"Pada mulanya dia agak sukar menerima masalah kesihatan ini tetapi sekarang, macam mana yang kita nampak dia sudah boleh terima keadaan itu dan bergerak dengan bantuan kerusi roda," katanya.

Hamili mengucapkan terima kasih atas sumbangan untuk suaminya itu kerana sedikit sebanyak meringankan beban tanggungan keluarga memandangkan dua anak mereka masih belajar iaitu seorang di tingkatan satu manakala seorang lagi menuntut di Universiti Malaysia Pahang. - BERNAMA